

खबरां

1. केंद्री मंत्री अमित शाह हुंदा आखना ऐ जे देसी आबादी दी सुरक्षा लेई स्हाड़े बन्ने गी सुरक्षित करना ते गैर कनूनी तौरा पर मुल्खै च दाखल होने आहलें गी रोकना ते उनेंगी बापस भेजना बड़ा गै महत्वपूर्ण ऐ।
2. सुप्रीम कोर्ट नै सब्भनें उच्च न्यायालयें गी आदेश सुरक्षित रखने दे 3 म्हीनें दे अंदर फैसला सनाने दा निर्देश दित्ता।
3. केंद्री शिक्षा मंत्री धर्मेन्द्र प्रधान होरें जोर देइयै आखेआ ऐ जे परीक्षा माफियें दे खलाफ सख्त कार्रवाई कीती जाह्य ते उनें योग्य मेदवारें गी सुरक्षा देने दा आश्वासन दित्तां
4. पी.एम सूर्य घर योजना नै इक्क बड्डी उपलब्धि हासल कीती, हुनै तगर 40 लक्ख परिवार अपने छत्तें पर सौरउर्जा अपनाई चुके दे ना।
5. भारती मौसम विभाग नै मुल्ख भरै च सामान्य कोला घट्ट मानसून ते जून म्हीने दरान कई राज्यें च सामान्य थमां मती लू चलने दी पेशगोई कीती ऐ।
6. ते आई.पी.एल क्रिकेट च अज्ज संझा चंडीगढ च क्वालीफायर 2 च गुजरात टाइटन्स ते राजस्थान रायल्स दा आमना-सामना होग।



Amit Shah Bhuj Visit

केन्द्री गृह मंत्री अमित शाह होरें आखेआ ऐ जे देसै दी आबादी दी सुरक्षा लेई साढे बन्ने गी सुरक्षित करना ते गैर-कनूनी तौर उप्पर मुल्ख च दाखल होने आहलें गी रोकना ते उनेंगी वापस भेजना बड़ा गै महत्वपूर्ण ऐ। शाह होर अज्ज गुजरात दे भुज च भारत-पाकिस्तान बन्ने कश बड्डी मती महत्वै आहली जी-7 ते जी-13 सरहदी चैकिं दा उद्घाटन करने परैन्त जवानें ते आम नागरिकें दे किट्ट अग्गे भाशण देआ करदे हे। उनें गलाया जे केन्द्र सरकार, भलेआं अज्जै-कल्लै दिएं तकनीकें जि'आं ड्रोन, रडार ते आधुनिक तारबंद दा इसतेमाल करियै बन्ने गी भलेआं सुरक्षित बनाना चांहदी ऐ। गृह मंत्री होरें इक नमें सुरक्षा ग्रिड गी पेश करने दे कन्नै बन्ने दे प्रबंधन च इक बड्डे ढांचागत बदलाव दा बी ऐलान कीता। उनें आखेआ जे बन्ने दी रिवायती सुरक्षा प्रणाली थमां अग्गे बधियै एह माडल, बसनीकें, सिविल प्रशासन ते मुकामी पुलस दे कन्नै बीएसएफ ते फौज गी जोड़ियै पूरे खित्ते दी सुरक्षा जकीनी बनाना आहला साबत होग।



SC-Judgements

सुप्रीम कोर्ट नै अज्ज पूरे मुल्खै दे सब्भनें हाई कोर्टें गी आदेश दित्ता ऐ जे ओह कुसै बी मामले च फैसला सुरक्षित रखने दे 3 म्हीनें दे अंदर गै अपना फैसला सुनाई देना। सुप्रीम कोर्ट नै इस गल्ल पर जोर दित्ता ऐ जे फैसले सनाने च चिर होने करी मुकद्दमा लडने आहलें दा नुकसान होई सकदा ऐ जिसी परतियै ठीक नेई कीता जाई सकदा। व्यक्तिगत स्वतंत्रता दे मसले च तौले फैसलें दी लोड गी रेखांकित करदे होई मुख् न्याधीश सूर्यकांत ते न्यामर्ति जायमाला बागची दे इक बैंच नै आखेआ ऐ जे एह जमानत याचिकाएं पर आदेश उससै दिन सनाए जाने लोडचदे ते जेकर ओह सुरक्षित रक्खे जंदे न ते उनेंगी अले दिन गै सुनाया ते अपलोड कीता जाना लोडचदा।



WB-Information

पच्छिम बंगाल दे मुख्मंत्री सुवेंदु अधिकारी होरें राज्य च घुसपैठ गी लेइयै चैता जतांदे होई आखेआ ऐ जे एहदे करी आबादी च बदलाव होई सकदा ऐ। राज्य सचिवालय च प्रधान जनगणना अधिकारिएं दे सम्मेलन दा उद्घाटन करदे होई मुख्मंत्री होरें आखेआ जे पैहलकी सरकार, घुसपैठ दे मामले पर कोई ठोस कार्रवाई करने च नाकाम

रेई ऐ। उंनें आखेआ जे उं'दे शा पैहले आहले तृणमूल कांग्रेस दे प्रशासन ने केन्द्र सरकार थमां बेल्ले सिर चिट्टियां थहोने दे बावजूद बी मरदमशुमारी सरबंधी अभियानें गी शुरु नेई कीता।

<><><><><><>

UN

विदेश मंत्री डा. एस जयशंकर होरें यू.एन दे संयुक्त राष्ट्र शांति सैनिकें दे अंतरराष्ट्री ध्याडे उप्पर दुनिया भर च सेवा देआ'रदे संयुक्त राष्ट्र दे शांति सैनिकें गी श्रद्धांजलि दित्ती। इक्क सोशल मीडिया पोस्ट च डा. एस. जयशंकर होरें वैश्विक शांति ते सुरक्षा बनाए रखने लेई उंदे दृढ संकल्प ते प्रतिबद्धता आस्तै संयुक्त राष्ट्र शांति अभियानें दे तैहत सेवा देआ'रदे बहादुर पुरूश ते महिलाएं दी सराहना कीती।

<><><><><><>

Pradhan-NEET

केंद्री शिक्षा मंत्री धर्मेन्द्र प्रधान होरें अज्ज आखेआ ऐ जे पेपर लीक होने दी घटना बड़ी दुखद ही जेडी नेई होनी चाइदी ही। डी.डी श्रयूज कन्नै अपने इक विशेष इंटरव्यू च उनें आखेआ जे परतियै म्तेहान करोआने दी प्रक्रिया रमानदारी आहले ठंगै सिर करोआई जाह्ग। उनें सब्बनें गी अपल कीती जे इस परीक्षा गी सफलतापूर्वक करोआने लेई सारे साम्भ-संभाल कन्नै कम्म करना। विद्यार्थियें दा संबोधन करदे होई प्रधान होरें आखेआ जे सरकारी उंदी परेशानियें गी समझदी ऐ जे उंदा इस पेपर दे लीक होने कन्नै विश्वास टुटेआ ऐ। उनें आखेआ जे अधिकारियें इस सरबंधे च कड़ा फैसला लैता ऐ तां जे योग्य मेदवारें दा नुकसान नेई होऐ ते उंदा भविक्ख परीक्षा माफियें दे हत्थें च नेई जावै। गुणवत्ता ते पारदर्शिता पर लोहू पांदे होई उनें आखेआ जे परतियै परीक्षा करोआने दा फैसला परीक्षा प्रणाली च निष्पक्षता बनाए रखना ऐ। उनें एहू आश्वासन दित्ता ऐ जे इस परीक्षा गी परतियै करोआने लेई हर मुमकिन जत्त कीता जा'रदा ऐ।

<><><><><><>

Delhi-NEET Free Buses

नीट यू.जी 2026 दी परीक्षा आस्तै दिल्ली सरकार नै एह्दे मेदवारें लेई डीटीसी बसें दी मुफ्त सेवा उपलब्ध करोआने दा फैसला कीता ऐ। एहू परीक्षा 21 जून गी होग। दिल्ली दी मुख्मन्त्री रेखा गुप्ता होरें आखेआ ऐ जे नीट-यूजी 2026 दे मेदवार अपना एडमिट दस्सियै इनें बसें दी मुफ्त सेवा लेई सकदे ना। उनें आखेआ एहू फैसला इस करी लैता गेआ ऐ तां जे कोई विद्यार्थी अपने भविक्ख बनाने आहले परीक्षा आहले दिन कुसै परेशान दा सामना नेई करना।

<><><><><><>

India Clean Energy

भारत ने अपनी स्वच्छ उर्जा दी जात्तरा च इक ऐतिहासिक उपलब्धि हासल कीती ऐ। केंद्री अक्षय उर्जा मंत्री प्रहलाद जोशी होरें सोशल मीडिया पोस्ट च दस्सेआ जे पी.एम सूर्यघर योजना दे तैहत हुनै धोड़ी 40 लक्ख मकानें दिएं छत्तें पर सौर उर्जा पैनल लाई दित्ते गे ना। उनें आखेआ जे एहू योजना छडी नवीनीकरण उर्जा दी पैहल नेई ऐ, सगुआं एहू नागरिकें गी बिजली उपभोक्ता थमां बिजली उत्पादक बी बना करदी ऐ। इस योजना राहें परौआरें गी बिजली दे खर्चे च कमी करने, सरकारी सब्सिडी दा लाहू ठोआने ते सिफर बिजली बिल बक्खी बधने च मदाद मिला करदी ऐ। उनें आखेआ जे सौर उर्जा कन्नै चलने आहले हर घरै दे कन्नै देश, उर्जा सुरखा, पर्यावरण स्थिरता ते आत्मनिर्भरता दे सुक्खने गी सच करने दी दिशा च अगड़ा बधा करदा ऐ।

<><><><><><>

India-Textile

केंद्री कपड़ा मंत्री गिरीराज सिंह होरें आखेआ ऐ जे प्रधानमंत्री नरेंद्र मोदी हुंदे नेतृत्व च भारत इक मजबूत अर्थबवस्था दे तौर पर उभरेआ ऐ ते सुधारें ते नीतिगत समर्थन दे माध्यम कन्नै कपड़ा खेत्तर च तेजी कन्नै बाद्दा होआ करदा ऐ। आंध्र प्रदेश दी 2 दिनें दी जात्तरा दे दरान अज्ज श्री सिंह होरें कृष्णा जिले दे मललावल्ली औद्योगिक पार्क च स्थित मोहन स्पिन टैक्स कंपनी दा दौरा कीता। उनें आखेआ जे मजूदा समें च भारत दे कपड़ा बजार दा कारोबार 15 लक्ख करोड़ रुपें शा मता ऐ ते सरकार बरे 2030 तगर इसी बधाइयै 25 लक्ख करोड़ रुपे शा मता करने पर कम्म करा'रदी ऐ।

<><><><><><>

RBI-Report

भारती रिजर्व बैंक नै अज्ज अपनी सलाना रिपोर्ट जारी कीती ऐ जेदे च दस्सेआ गेदा ऐ जे मजबूत आर्थिक बुनियादी ढांचे मौजूदा वित्तीय बरे च भारती अर्थ बवस्था दे विकास बत्तै दा समर्थन करंगन, एह्दे बावजूद जे उर्जा कीमतां बधा'रदियां न, आपूर्ति श्रृंखला च ते वैश्विक बजार च अस्थिरता कन्नै चुनौतियां बनी दियां ना। आरबीआई रिपोर्ट मूजब कारपोरेट ते बैंकिंग क्षेत्रें दी स्वस्थ बैलेंस शीट, पूंजीगत खर्चें पर निर्भर करदा ऐ ते सरकार दे लगातार जोर दे कन्नै एह्दे पर खर्चा भारत दे मजबूत विकास बत्तै आस्तै अच्छा संकेत ऐ।

<><><><><><>

PM-Quote

प्रधानमंत्री नरेंद्र मोदी होरें अज्ज जोर देइयै आखेआ ऐ जे विनम्रता, माफ करने ते नेक आचरण गै व्यक्तित्व दे असली गहने ना। इक संस्कृत श्लोक सांझा करदे होई श्री मोदी होरें आखेआ जे इनें गुणों दे कन्नोकन्नी देशवासी अज्ज इक्क विकसित भारत दे संकल्प गी पूरा करने च लगातार लगगे दे ना।

<><><><><><>

Weather

भारती मौसम विभाग नै मुख भरै च जून च सामान्य थमां घट्ट बरसांती बरखा ते किश राज्यें च सामान्य थमां बढ़ लू चलने दी पेशगोई कीती ऐ। मीडिया दा संबोधन करदे होई मौसम विभाग दे डरैक्टर जनरल डा. मृत्युंजय मोहापात्रा होरें आखेआ जे जून म्हीने च मुख भरै च औसत बरखा सामान्य थमां घट्ट रौहंगा। उनें आखेआ जे इस दरान मुखे दे किश हिस्सें जियां उत्तर प्रदेश, उत्तर पूर्वी ते दक्खन भारत च गै सामान्य जां औह्दे शा बढ़ बरखा पेई सकदी ऐ।

<><><><><><>

IPL

आईपीएल क्रिकेट च अज्ज संझा महाराजा यादविंद्र सिंह अंतरराष्ट्री स्टेडियम न्यू चंडीगढ च होने आह्ले महत्वपूर्ण क्वालीफायर 2 च गुजरात टाइटन्स ते राजस्थान रायल्स दा मुकाबला होग। इस मैच दा विजेता ऐतवारें अहमदाबाद दे नरेंद्र मोदी स्टेडियम च होने आह्ले आईपीएल 2026 दे फाइनल च रायल चैलेंजर्स बेंगलुरु कन्नै मुकाबला करग।

<><><><><><>

VP

उपराष्ट्रपति सी.पी राधाकृष्णन होरें अंद्रूनी ते वैश्विक शांति आस्तै भक्ति ते ध्यान लाने दी जरूरतै पर लोहू पाई। अज्ज बेंगलुरु च आर्ट आफ लिविंग फाउंडेशन दे अंतरराष्ट्री केंद्र च 45मीं बरेगंड दे समारोह दरान अपने संबोधन च उनें आखेआ जे भक्ति अपने आपै आस्तै अपने परौआर, समाज, राष्ट्र ते मनुक्खता लेई समर्पण गी दर्शादी ऐ ते लोकें गी भाईचारे कन्नै रौहने आस्तै प्रेरित करदी ऐ।

<><><><><><>

Former Prez. Tributes

उपराष्ट्रपति सी.पी राधाकृष्णन, लोकसभा अध्यक्ष ओम बिरला ते केंद्री गृह मंत्री अमित शाह होरें साबका प्रधानमंत्री चौधरी चरण सिंह होरें गी उंदी पुण्यतीथि पर उनेंगी श्रद्धांजलि भेंट कीती। इक सोशल मीडिया पोस्ट च उपराष्ट्रपति होरें आखेआ जे एहू साबका प्रधानमंत्री चौधरी चरण सिंह होर इक्क दूरदर्शी नेता हे ते करसानें दा समर्थन करदे हे। उनें अपना पूरा जीवन ग्रामीण भारत ते कृषि समुदाय दे कल्याण आस्तै समर्पित करी दित्ता हा। लोकसभा अध्यक्ष होरें इस गल्ला पर बी जोर दित्ता जे उनें अपना पूरा जीवन मुख दे करसानें, मजदूरें ते ग्राएं दे कल्याणें आस्तै समर्पित करी दित्ता। श्री शाह होरें बी आखेआ जे भारत रत्न चौधरी चरण सिंह होरें स्वतंत्रता संग्राम थमां लेइयै आपातकाल दे दौर धोड़ी लोकतांत्रिक मूल्लें गी मजबूत करने लेई इक अहम भूमिका निभाई।

<><><><><><>

Jitendra-Sky Cast

विज्ञान ते टेकनालजी मंत्री डाक्टर जितेंद्र सिंह होरें अज्ज नमीं दिल्ली दे इंदिरा गांधी अंतरराश्ट्री ब्हाई अड्डे पर भारत दी पैहली अगली पीढी दी संगठित विमानन मौसम ते कोहरे दी निगरानी आहली प्रणाली स्काई कास्ट दा उद्घाटन कीता। एह गैहू मिशन मौसम दे तैहत कीती गई ऐ। संवाददाता सम्मेलन गी संबोधित करदे होई डाक्टर सिंह होरें आखेआ जे इस नमीं प्रणाली दा मकसद ब्हाई अड्डे पर मौसम दी निगरानी ते कोहरे दी भविष्यवाणी प्रणाली गी मजबूत करना ऐ। उनें दस्सेआ जे स्काई कास्ट गी खासतौरा पर स्यालें दरान घने कोहरे ते तेजी कन्नै बदलदे मौसम दे हासलात दे दरान मता सुरक्षित, कुशल ते मौसम दे अनुकूल ब्हाई डोआरिणं च सहायता लेई विकसित कीता गेआ ऐ।

<><><><><><>

UP Workers Killed

उत्तर प्रदेश दे हमीरपुर जिले च इक्क पुल दा कम्म चला'रदा हा जेदे च कम्म करारदे घट्टोघट्ट 6 मजदूरें दी मौत होई गई। एह पुल बेटवा नदी उप्पर बने दा ऐ जेडा मेराकनदार गी कंडौर ग्रां कन्नै जोड़दा ऐ। एह हादसा खीरी रांती 2 बजे होआ जिसलै किश मजदूर बरखा दे चलदे हाइड्रा मशीन दे हेठ खडोते दे हे।

<><><><><><>

Karnatka Council of Ministers

कर्नाटक दे राज्यपाल थावरचंद गहलोत होरें अज्ज बेंगलुरू च मुखमंत्री सिद्धारमैया हुंदा इस्तीफा स्वीकार कीता ते मंत्रि परिषद गी तुरत प्रभावी ढंगै कन्नै भंग करी दित्ता। हालांकि उनेंगी वैकल्पिक बवस्था होने तगर मुखमंत्री दे रूपै च अपनी कुर्सी पर बने रौहने लेई आखेआ गेदा ऐ। उनेंगी इस अवधि दे दरान कुसै बी कार्यकारी फैसले गी नेई लैने आस्तै बी आखेआ गेदा हा।

<><><><><><>

Fake-Video

सोशल मीडिया पर प्रधानमंत्री नरेंद्र मोदी हुंदी इक्क फर्जी वीडियो वायरल कीता जा'रदा ऐ जेदे च एह दस्सेआ गेदा ऐ जे प्रधानमंत्री मोदी इटली दी प्रधानमंत्री जार्जिया मेलोनी हुंदे बारै च किश गलत टिप्पणियां करा'रदे न ते ईरान-अमरीका दी लड़ाई बश्कार बचाऽ करने दी गल्ल करा'रदे न। असलियत च मोदी होरें ऐसा कोई बी बयान नेई दित्ता ऐ ते सरकार नै इस वीडियो दा खंडन कीता ऐ। पी.आई.बी दी फैक्ट चैक इकाई नै एह दावा कीता ऐ जे एह वीडियो ए.आई दा इस्तेमाल करियै बनाई गेदी ऐ। पीआईबी नै इब्बी नोट कीता ऐ जे एह वीडियो पाकिस्तानी प्रचार खातें राणं प्रसारित कीती जा'रदी ऐ।

<><><><><><>